

- 5465 dat herte, de lever mit der lungen,
 dit dêl horet tō juwen jungen.
 my horet tō de vēr vōte,
 unde Ysegrim dat hovet, wente dat is sōte.
 also gy dit hōrden, spreke gy do:
- 5470 Reinke, we lērde dy delen also,
 so rechte hoveschliken? lāt my vorstān!
 ik sprak: here, dat heft gedān
 desse, dēme so rōt is de kop
 unde dēme so blodich is de top.
- 5475 wente hūden, do Ysegrim deledē dat verken,
 dārby begunde ik do to merken
 unde lērde do den rechten sin,
 wo men lyke schal delen kalf efte swyn.
 sus krēch Ysegrim, de gyrige dwās,
- 5480 schaden unde schande vor synen vrās.
 wo vele vint men noch sodane wulve,
 de alle dage bruken dat sulve,
 unde ere undersaten vorslinden,
 se sparen nicht, wōr se de vinden.
- 5485 alwōr ēn wulf sus over mach,
 des wolvārt kricht enen ummeslach.
 ēn wulf sparet nicht vlēsch noch blōt:
 we em, de ēn sadigen mot!
 we der stat unde dēme lande,
- 5490 dār wulve krygen de overe hande!
 sēt, her konnink, gnēdige here,
 sodane ere unde dēr noch mere,
 de hebbe gy to mannigen stunden
 vaken unde vele by my gevonden.
- 5495 wes ik hebbe unde mach gewinnen
 is alle juwe unde der konniginnen;
 dat sy weinich efte vele,
 ja, dat mēste is al juwe dele.
 denke gy des kalves unde verken,
- 5500 so wille gy wol de wārheit merken,
 by wēme de rechte truwe mach syn,
 by Reinken efte by Ysegrin.
 nu is de wulf sēr vorhoget,
 unde is by ju de grōtste voget;
- 5505 nicht menet he juwe vordēl,
 men syn egen geit vōr bede half unde hēl.
 he unde Brūn hebben nu dat wōrt,
 men Reinken sake wert node gehōrt.
 here, it is wār, ik bin vorklaget;
- 5510 ik mot dārdorch, it mot syn gewaget!
 is hier to hove jennich man,
 de my de sake overtügen kan,
 de kome mit den tügen tor sprake
 unde klage hier ene vaste sake,